

<b>Headline</b>	<b>Tingkatkan Ilmu Untuk Dihormati</b>	<b>Language</b>	<b>MALAY</b>
<b>Date</b>	<b>21. Feb 2008</b>	<b>Page No</b>	<b>27</b>
<b>Media Title</b>	<b>Utusan Malaysia</b>	<b>Article Size</b>	<b>346 cm<sup>2</sup></b>
<b>Section</b>	<b>Dalam Negeri</b>	<b>Frequency</b>	<b>Daily</b>
<b>Circulation</b>	<b>238082</b>	<b>Color</b>	<b>Full Color</b>
<b>Readership</b>	<b>833287</b>		



# Tingkatkan ilmu untuk dihormati

CHERAS 20 Feb. – Guru-guru kaunseling perlu sentiasa meningkatkan ilmu dan bijak menangani masalah pelajar bagi mengembalikan semula keyakinan dan rasa hormat masyarakat kepada profesi mereka sebagai pendidik.

Pengerusi Yayasan Pendidikan Cheras (YPC), Datuk Syed Ali Alhabshee berkata, ia penting agar masyarakat dan pelajar khususnya, mengiktiraf dan tidak memperlekehkan kerjaya yang mulia itu.

"Kalau kita lihat akhir-akhir ini, kerjaya guru seperti diperlekehkan. Terdapat kes di mana ibu bapa menyerang atau menyaman guru sedangkan ia tidak sepatutnya berlaku."

"Ini kerana masyarakat mula memandang rendah terhadap profesi guru," katanya selepas menuju Seminar Peningkatan Profesionalisme Untuk Guru-guru Kaunseling Sekolah Menengah Wilayah Persekutuan di Kolej YPC di sini.

Syed Ali berkata, menyedari perkembangan itu dan tidak mahu ia berlarutan, pihaknya mengambil inisiatif mengajukan seminar itu bagi menambah ilmu guru-guru kaunseling di seluruh Wilayah Persekutuan.

"Seminar ini memanggil pakar-pakar untuk menunjukkan cara kepada guru-guru tentang bagaimana cara menangani masalah supaya tahap profesionalisme me-

reka dapat ditingkatkan.

"Untuk dipandang mulia, guru-guru perlu ada kemahiran, maka mereka perlu bersedia menghadiri seminar untuk memperbaiki diri dengan ilmu kaunseling, motivasi ICT (teknologi komunikasi dan maklumat) dan lain-lain yang akan membantu mereka menangani masalah berkaitan pelajar dan ibu bapa," ujarnya lagi.

Sebanyak 95 orang guru kaunseling mengikuti seminar sehari itu, yang dikendalikan oleh dua pakar iaitu bekas pensyarah Universiti Malaya, Dr Fatanah Mohamed dan Pensyarah Komunikasi Universiti Putra Malaysia, Ishak Hamid.

Syed Ali seterusnya meminta guru-guru kaunseling agar tidak berputus asa terhadap pelajar-pelajar mereka walau seberat mana sekali pun masalah yang mereka hadapi.

Katanya, antara tanggungjawab berat guru kaunseling ialah membina keyakinan diri pelajar-pelajar supaya mereka mampu membuat keputusan, bukan sahaja untuk diri mereka tetapi juga untuk menetapkan matlamat berhubung kerjaya dan masa depan.

Selain itu, katanya, guru-guru juga perlu bekerjasama dengan masyarakat, ibu bapa dan pelajar bagi memastikan matlamat negara untuk melahirkan modal insan terbaik dapat dicapai.



**TUMPUAN PENUH...** Guru-guru kaunseling tekun mendengar syarahan dari dua pakar kaunseling pada Seminar Peningkatan Profesionalisme Guru-guru Kaunseling di Kuala Lumpur, kelmarin.